

Avanersuarmi aammalu Tunumi Sumiorpaluutit atuartunit sukumiinerusumik ilisimaneqarnerulernissaat anguniarlugu Meeqqat Atuarfianni ilinniartitsissutit allanngortinneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Doris J. Jensen, Siumut)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartunut ilaasortaq Doris J. Jensen, Siumumeersoq, aalajangiiffigisassatut siunnersuutaanut qutsavigaat.

Naalakkersuisut siunnersuuteqartoq isumaqatigaat, meerartatta sumiorpaluutit nunatsinni atorneqartut assigiinngitsut siunissami ilisimasaqarfigissagaat sumiorpaluutillu attatiinnarneqassasut.

Naalakkersuisut meeqqat atuarfianni atuartunut piumasaqaataasut akulikippallaamik allanngortinneqartanninnissaat pingaartitaraat. Atuartut ilinniartitsissullu eqqissillutik atuartitsissutit siunertaat ilikkagassatullu anguniagassat piumasaqaataasut piviusunngortikkiartortariaqarpaat. Taakkua allanngortikulaneqarpallaassappata atuartitsinerup pitsaassusaanut taamaalillunilu aamma atuartut pissarsiaannut sunniuteqarsinnaavoq.

Atuarfik pillugu Inatsisartut inatsisaata allanngortinneqarnera Inatsisartut inatsisaat nr 9, 19. november 2021-meersup Atuarfimmi atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit Namminersornerullutik Oqartussat nalunaarutaata nr. 16, 24. juuni 2003-meersup nutarterneqarnissaa pisariaqalersippaa. Susasaqartut attuumassuteqartut oqaloqatigalugit suleqatigalugillu atuartitsissutini tamani ilikkagassatut anguniagassat ukioq manna nutarterneqarsimapput atornissaallu piuminarnerulersinneqarsimallutik. Nalunaarut nutartigaq augustip aallaqqaataani 2023 atortuulersinneqarpoq aallaqqaammullu 1. klassimimiit 7. klassimut atuartunut atuuttussaavoq. Ukioq manna 8. klassimi atualersunut angajulliunerusunullu ilikkagassatut anguniagassat pisoqqat malinneqassapput.

Kalaallit oqaasiinik atuartitsinermi atuarfimmi, atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit Namminersornerullutik Oqartussat nalunaarutaanni nr. 16, 24. juuni 2003-meersumi sumiorpaluutsit taaneqartartut piorsarsimassutsimik inuuniarnermilu atugassarititaasunik sammisaqarnermi sumiorpaluutsit assigiinngitsut Inuillu oqaasii toqqakkat sammineqartartussaapput atuarnerullu naammassinnerani ilisimasaqarfigineqalersimasussaallutik. Kalaallisut atuartitsinermut pilersaarutini ilitsersuutaasuni aamma kalaallit Nunaanni sumiorpaluutini atuartitsinerne atuartitsinermut assersuusiaqarpoq.

Ilikkagassatut anguniagassani nutartikkani ukiumi maanna atuartitsiviusumi 1. klassiniit 7. klassinut nukarlerni akullernilu atuartitsinermi aamma oqaatsitta sumiorpaluutaat assigiinngitsut sammisami ”Attaveqatigiinnermi” atuartitsissutaasussaapput.

Ilanngullugu oqaatigineqassaaq Ilinniartitaanermut Aqutsisoqarfiup Ilinniusiorfiata kalaallisut atuartitsinermit atugassatut saqqummersitai ataasiakkaat simiorpaluutinik ilaqarmata.

Naalakkersuisut pimmatiginnittarneq akiorniarlugu periusissioornikuupput Ilinniartitaanermullu Aqutsisoqarfiup maannakkut atuutilersinniarlugu sulissutigaa. Periusissiaq ulluunerani paaqqinnittarfinnut, atuarfinnut, sunngiffimmi neqeroorutinut, inuusuttut ilinniarfiinut atuartullu angerlarsumaffinnut sammisinnerqarpoq. Periusissiaq sammisanut 12-nut sammitinnerqarpoq tassunga ilaallutik ”Kinaassutsit aporaattut” aamma ”Tunumeersuuneq”. Pimmatiginnittarnermik pimoorussilluni pitsaaliuinerit meeqqat sumiorpaluutitik peqqutigalugit pimmatigineqartarneri pitsaalisinnaavaa.

Naalakkersuisut oqaatsit pillugit inatsimmik nutarteriniarput. Tassunga atatillugu pissusissamisoortuussaaq nalilissallugu sumiorpaluutit annerit atornerqarneri pillugit aalajangersakkat itisilerneqarnerussanersut. Tamassuma nunatsinni sumiorpaluutit ilisimaneqarnerulertissavai sumiorpaluutillu ammaffigineqarnerulernissaat ataqqineqarnerulernissaallugu annertusassallugu.

Tamakku tunngavigalugit Naalakkersuisut itigartitsissutigineqassasoq inassutigaat.